

## Lo ptchi pintalong rodzò.

(Petite histoire vraie et vécue et racontée par Pierre Boniface)

L'iévé na fran bella dgjorna dé dzeuliet, l'aria liévé dousoa é boudgiévé a peinò, lo sleil achodavé doucément la pél , la dgjorna liévé fran fèta per l'avventeuoa d'eung ptchit dé sinq'ans !

Dziévo défoua, su la roua, davante la mijong Pera, kint is arvoua dé dazoué, d'eung pas rapido, Sévring Grosset, k'allavé porta la mingdoa a song fraé Germain, bergié o Vallong.

« Bondzor ...bondzor...comé té vèss ? » « Bienn ...bienn.. » « Vont tévès pouié si vutò ? » « ...Dzé portò la mingdoa a mon fraé Germain kis bergié o Vallong... » . Sévring iévé nestissoa plu viél kémé é avét alloué, dzé créiò, nov'ante! Lo Vallong, dzé lo conosiévo pas, ma din ma téioa dé sing' ans, iévé devenu, per cetta bella dgjorna dé dzeulièt...Delvallong !,

« Dzé vollioa d'alla avoué té ? » « Djioké, diojké, véng peuoaa... » « Kin té tornès ?... » « To dé suitoa, dzé fè ké porta la mingdoa a mon fraé é dzé torno »... é tou douss , deung meum pas zing prieue lo pong de Bessans per passa dell'altro caro !

«Sévring ... Perché passeing dé sa caro dou pont ?...Zing pas bezeung de traversa l'évoa per alla Delvallong ! » dzeu dzé pensavo passa per lo Saoudang.

«Ouais...mé dzé conisso mèké sa tséming iké.. » Alloué dzé pensavo, ké plu leung iévé certaminte na passerélloua per torna a Delvallong ! L'avvinteuoa comintchévé iké !

O ré de la Saunniéé, iévé plu kestiong dou Vallong o dé Delvallong, mè solaminte dou plèizi dé martchié tou douss, seulès, o sleil, en pléina libertà ...

Sing passa per lo Plan Fanett, marchante d'in la pousoa feïnoa dou tséming kiévé déposa per l'éïvoa, kin li aouta , é din sa silentzo particulié, vong lo breut dé la viò dé Bessang né sé sint pas plus, é poué zing preui la monta . La monta l'iévé réida, é fézét vuto veie Bessans dé dazoué, comé d'ordinè lo veïng jamès, é l'eung comé l'altro zing to dé suitoa tcherchoa a trova nossa mizong, é sing partis tornò per la monta, solaminte kin dzaviong trovala.

Din la monta, todzor l'avvinteuoa, iévé meumò ung ré vont iévé possiblo de passa contra la rotzé darrèè l'évoa dou gran pichoï ...

Arrvoua o Vallong, zing partadgiò la mengdoa avoué Germain, mè seurtot, zing trova, avoué Severing na bella rodzoa k'iévé djeusto comé fallét per dé sa seumoa, salta bass din lé molliès déna pchitta fontoungna, é zing commenciò a sauta dé dézainès é dé dézainès dé yazos, bass din la mousoa pléina d'évoa...é ptchiak...é ptchiak...é ptchiak couò...Ayò tou douss insimblé...é torna ...Ptchiak ! Eung pléïzy d'infer !

Mintré sen iké, lo tins passavé...é zing compris ké déviong vuto torna bass in Bessans, é sing partis in fretta...

Tot a col, comé sé dzavisso veuie na maskoa, au mingting della desingta, è sorti dou moro just devant nos âtros, mon avo Eugène Péra , fratello dé ma maé, rodzo d'avveï martchja vuto, los yous nei comé jamès, ké povét plu trova song fla, é meumo ké cherkavé à baillé mé eung oeïllong , é ké dézèt in grin kolea : « Mé ké té fès iké Ptchit, ti poué parti pouié, senza lo dié...fullò tot dé suitoa alla mizong, ké ta maé t'attinse . Oh ! mouchtro néi »

L'adventeuoa liévé, comé poleng dié, bella fréni, plu de Vallong, ni dé Delvallong, solaminte la duoa réalita d'incontraé ma maé kiévé devant la mizong o mingting della roua, avoué na dézeïnoa de personé é d'amis ké mé féizont pouò, a vei loro teiés. !

Dzé poué appreuis, ké depuis midzor, pindinte treis oués, la meïta dé Bessang mé cercavé, ma maé créiévé ké dzé fisso tomba din l'évoa de l'Arc, or ké karkeung , passante in vouiteuoaa, moffisse preuis , mè is Michelette, todzor tchassou, k'avévé preuis lé so juméllès é ké demandante à ma maé comé dziévo vestido, m'a finaleminte trovato au Vallong graça a mong famous ...ptchi pintalong rodzò !

Ma l'esteué l'iévé pas fréni iké, dzé atchapa na bella sepetta o orkiiés ké vo baglié eung bél fastugio allé gambés per plu dé douès ouès. Dé plus, durante to lo tsoungtinse, et couoa l'an d'après, iévé todzor na bessaneise, per mé dié avoué un pchit souriré beurbo : « Alors Pierò, tu ne retournes plus au Vallon ? ».

Djioké, ké dzé polié rieng dié, é ké dzé dézè rieng, mè dzé réconisse, aveï volontié volu karké iadzo dié sing ké dzé pensavo dé la tsoza ...ma comé spiégà a to sa moungho kiévé na si bella dgjorna d'avventeuoa !